

LA WG CHEZ FRAU ZIMMERLI

da Chatrina Josty

Jau hai bandunà Friburg ed abitesch uss per in temp a Cuira. Clar che jau m'hai puspè decida per la meglra furma d'abitar – per la wg. Jau stun uss puspè en ina wg da trais – la Frau Zimmerli, che pudess esser mia Nona, Mike da la ex-DDR ed jau. Cun la Frau Zimmerli avev'jau telefonà avant in pèr emnas e sun ida a guardar la chombra. «Tiptop» ha jau chattà e «tiptop» m'ha ella grad dà la clav in maun, che jau possia lura gnir a star la, duas emnas pli tard. Ed uschia sun jau arrivada, duas emnas pli tard, cun circa duas tonnas bagascha. Jau scalin e l'emprim che jau ves en dus piercings. Tras ils chavadès. Jau dauz mia egliada e vez anc dapli piercings e chavels blondids. Quai n'è betg Frau Zimmerli. «Jau sun Mike», di il giuven e ma prenda la bagascha ord maun.

Tja. Jau sun arrivada.

Clar ch'igl è in pau in'otra moda da wg sco quella da Friburg. Da Mike ves jau pauc fin ussa, jau aud mo ses svegliarin la damaun a las sis, e savur il fim da sia emprima cigaretta. Dapli hai jau da far cun la Frau Zimmerli. U meglier dit, ella cun mai. La Frau Zimmerli è stada en mia chombra, constatesch jau mintgamai la saira cur che jau turn da la lavur. Suenter in emprima, leva irritaziun, hai jau però chapì ils avantatgs: Frau Zimmerli fa mes letg, (tge che jau na faschess mai) ella fa urden e lava giu. E la damaun, cur che jau vegn ord chasa, e clom «uf widerluaga» currella anc spert nà e ma dat in mail. La saira ma dat ella tschareschas ed ampuaunas e raquinta dad Otto. «Sas, Otto ha in grond parasol ed Otto ha era uschè bellas sadellas ed Otto n'è betg in char». Jau na chapesch betg. Tgi è Otto? E quai quest tip che vegn la saira adina a far la visita a la Frau Zimmerli? Ma cur ch'ella ma raquinta ch'ella saja oz puspè stada EN il Otto ma croda il tschintger: Ella discorra dal «Ottos Warenposten». Aha! E sche ses ami, che n'ha en quest cas betg num Otto, vegn la saira, lura è quai la bun'ocasiun per mai da svanir en mia chombra, nua che la televisiun (perfetg!) ma spetga e nua che jau poss trair en per la 1000avla giada l'emprima episoda da «Sex and the City». Gea, jau stun bain, chez Frau Zimmerli.

La «WG» - Chatrina Josty è studenta a Friburg e scriva dal mintgadi en la «WG» – la cuminanzad'abitar.